

**COVID-19: Pusat Media Sains Malaysia dilancarkan bagi menyokong media
Astro Awani
01 April 2020
Isabelle Leong,**

KETIKA dunia berdepan dengan krisis pandemik COVID-19, rata-rata warga dunia menuntut lebih banyak penekanan dalam liputan media agar berita dilaporkan secara tepat dan berdasarkan fakta sains.

Menyahut seruan tersebut, Pusat Informasi Bioteknologi Malaysia (MABIC) dan surat khabar sains miliknya, The Petri Dish melancarkan platform maya iaitu Pusat Sains Media (SMC) Malaysia di www.sciencemediacentremalaysia.com.

SMC Malaysia dapat menyalurkan maklumat berdasarkan bukti dan fakta sains bagi menyokong liputan media berkenaan isu-isu sains yang kompleks.

Pengasas Bersama SMC Malaysia, Tan Su Lin berkata, pihaknya memahami cabaran yang diharungi pengamal media dalam mendapatkan maklumat secara pantas dan tepat berhubung isu sains dan reaksi daripada pakar sains.

“Ketika ini terdapat banyak maklumat tidak tepat mengenai COVID-19 terutamanya dalam media sosial. Kami ingin membantu menyebarkan maklumat yang tepat tentang risiko jangkitan virus itu dengan menangani maklumat yang tidak sah dengan fakta sains dan ini dilakukan menerusi liputan media.

“Kami juga tahu wartawan sentiasa sibuk dengan tugas dan ‘deadline’ mereka. Oleh itu, pusat informasi kami akan menyediakan kenyataan dan reaksi dari pakar sains termasuk berhubung COVID-19 yang boleh dipetik dan dimasukkan dalam laporan mereka,” kata Su Lin dalam satu kenyataan.

Sementara itu, Pengasas Bersama SMC Malaysia, Dr Mahaletchumy Arujanan pula berkata, platform itu turut mengumpul reaksi pakar-pakar sains berhubung COVID-19 dan ia termasuk aspek virologi, genome, vaksin dan rawatan untuk rujukan wartawan.

“Selepas pandemik ini, SMC Malaysia berharap untuk menjadi penghubung antara komuniti saintis dan wartawan bagi memastikan ilmu sains dapat sampai kepada orang awam tanpa dicemari maklumat tidak tepat,” kata Dr. Mahaletchumy.

Menghubungkan wartawan dengan saintis untuk ditemu uamah

Platform maya itu juga menghubungkan wartawan dengan saintis untuk ditemu ramah daripada pelbagai aspek penyelidikan menerusi pangkalan data saintis.

Menurut Dr Mahaletchumy, SMC Malaysia turut menyediakan kursus latihan untuk media dan saintis, selain mewujudkan jaringan saintis-wartawan yang berterusan serta meuar-uarkan penemuan sains terbaharu tanah air.

“Saya berharap usaha ini akan mendapat sokongan daripada komuniti sains termasuk saintis, institusi-institusi pengajian tinggi, pusat-pusat penyelidikan dan agensi-agensi kerajaan dalam meningkatkan komunikasi sains dan literasi sains di negara ini.

“SMC Malaysia mengalu-alukan komuniti sains menggunakan platform ini untuk berkongsi kepakaran masing-masing dalam isu berkaitan sains. Pusat maya ini akan menjadi pengantara bagi menghubungkan saintis dan pengamal media.

“Jaringan wartawan-saintis SMC ini juga berharap dapat meningkatkan kualiti dan kuantiti laporan media mengenai topik sains dan sekaligus menghubungkan orang awam dengan pengetahuan sains,” katanya.

SMC Malaysia merupakan salah satu jaringan antarabangsa Pusat Sains Media (SMC) yang ditubuhkan di seluruh dunia termasuk UK, New Zealand, Australia, Jerman dan Kanada.

SMC beroperasi sebagai pertubuhan bukan untung yang bekerjasama dengan pengamal media serta institusi sains di negara masing-masing, dengan tujuan untuk meningkatkan liputan sains dalam berita-berita utama.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/covid-19-pusat-media-sains-malaysia-dilancarkan-bagi-menyokong-media-236253>